



Aqqalu C. Jerimiassen

UKA 2025/27-1

Atassut

25. September 2025

Kalaallit Nunaanni pinerluttulerinermi inatsisip allanngortinneqarnera pillugu inatsisip (Killilikkamik piffissaligaasumik inissiisarfimmi inissiinermi piffissap sivilunerpaaffissaata qaffanneqarnera) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Pineqaatissiisarneq sakkukippallaaqaaq! Pillaasarneq eqqunneqartariaqarpoq nunatsinni, takusagut naammaleqaat!

Inuiaqatigiinni avaanngunartorsuaq pisartoq tassaavoq, meerannguit miguinnerpaat inersimasorsuit sorraangaarlutik inuunerinik aserorterileraangata. AKUERSAARNEQARSINNAANNGILAQ!

Inuk iluartoq taamatut iliuuseqarunnanngilaq, meerannguup inuunera aserorlugu.

Nalliginnikkunnaarniarta inunnut ajortuliorsimasunut, nallinnanngillat piliarsui taamak amiilaarnartigisut. Pillagassanuku!

Inuiaqatigiinni kinguaassiutitigut ukiukinnerusunut kanngutsaatuliortarnerit eqqarsaatigalugit, kisitsisit amiilaarnaannartumik qaffasitsillugit sapiissuseqarluta sakkortuumik aaliangertariaqarpugut, inoqatitta inuuneranik sequmiisut salliukkunnaarlugit iliuusaalli aallaavigalugit pineqaatissiinnarnagit pillartalertariaqarpagut.

Meerannguanut atonerluisartut ullumikkumiit ajornanngitsuuppat Atassummiit piumajunnaarsaatinik iijoraatinneqalernissaat piumasarerusukkaluarparput, inuummi inuuneranik aseruisoq naakkigineqartariaqanngilaq, tassami uani kanngutsaatsuliortoqarsimatillugu meeraq kisimi eqqorneqarneq ajorpoq, qanigisaasulli annertuumissaaq eqqornerlunneqartarpoq, killiliisa!

Nunarput tamaat kisitsisit eqqarsaatiginganni, kinguaassiutitigut kanngutsaatsuliornerit toqutsinerillu, inuttussutsimut agguaqatigiisillugu nunarsuup sinneranut sanilliukkaanni, ajoraluartumik kisitsisit tulluusimaarutissaanngilluinnartut tassuuna takusussaavagut.

Tamannalu pillugu pineqaatissiisarnikkut periutsit iluatsippallaarsimanngitsut ukiorpanni nassuerutiginnartariaqarparput.

Nassuerutissalli annernarsinnaasut ilagisaattaaq tassaavoq, angerlarsimaffeqannginnerup avatagiisillu tujorminartut aniguingaanni uterfigeqqinngissaat pillugu allaat isertitsivimmut uteqqikkusuttoqartartoq tusarneqartarmat. Taannalu tupigisassaalaaraluarluni eqqarsaatigilluaraanni paasineqarsinnaavoq, tassami inoqatitta ilaat, ajoraluartumik isertitsiviit kialaarfitut toqqissisimaffittullu isigisinnaalersimappatikkut nunatsinni iluarsisariallit taajugassagut sulii ammerlasimaqaat.



Isertitsivimmut uteqqikkusulluni inoqammik allamik inuarterinninneq allaat anguneqartarpat, inuiaqatigiinni suliaasaq annertooq qiviangassaqqippoq. Inoqatittami ilaasa qulaani taariikkattut, isertitsivimmiinnerminni qulakkeertakkatik iluarilersimavaat, innarfissaqarneq nerisassaqartuaannarnerlu, tassamigooq anisussanngorlutik massa ilaat anerusugatik toqqorlutik qimaaqqasut.

Ilaa aninnerminni isertitsivimmiittoqatiminnut oqartarsimapput: “qaammatalunnguit qaangiuppata takuss”. Ila pissutsit tamakku tupinnaqaat.

Inuartut peqqarniitsumik iliorlutik, taakkua pineqaatissinneqartarnerat ukiorpanni eqqartungaaajuareerpoq, qujanarporlu maanna naalakkersuisutta nikalluinnaratik iliuusissanik suliniuteqarnerat.

Naggasiuteqartigatali Atassumiit una uteqqitsikku, pineqaatissiisarneq amingarpoq, pillaaarneq eqqunneqarniarli! Nalligineqartariaqanngillat pinerluttut sakkortuumik, pillagassanuku!

Taamatut naatsukullammik Atassummiit oqariatuuteqarluta, naalakkersuisut suli annerungaartumik naalagaaffimmi oqartussaasunut oqariatoqqittariaqarnerinik kaammattorumavagut, unalu siunnersuutaasoq aappassaaneerneqartigani Inatsisinut ataatsimiitsitaliamut ingerlanneqarnissaa innersuullutigu.